

四庫全書

集部

欽定四庫全書

集部
秋澗集卷六十二至五

詳校官侍讀學士臣沈懋熙

侍讀臣孫球覆勘

總校官降調編修臣

倉聖脉

校對官編修臣

于鼎

謄錄監生臣

汪致基

欽定四庫全書

秋澗集卷六十二

元 王惲 撰

文

詛蠹魚文 并序

王子曝書于庭風動帙開有蠹十數輩倘佯其間取書
眎之甚有齧壞者遂為文以詛之亦且攄予懷之梗既
云其辭曰

嗟上蒼之生物兮曾巨細之不遺隨一物而一名兮乃
各有其所施竟驤首而霧集兮驚搏擊而翰飛蜴緣隙
而射蝎兮蚓含淒而應時蟻結陣而雨妥兮蛛縈絲而
喜隨至於蛇虺毒而虎豹猛兮網繩櫛刃人得驅而遠
之彼蠹魚之何為兮當去之而不疑我固拙而未貧兮
尚其書之滿家規姚姒而法周孔兮浩波瀾之無涯念
披讀而有次兮譬草木之品差歲翻閱而莫周兮蠹乘
隙而遺孽芽感餘浥而化育兮何族類之紛拏正如深

山大澤人迹所不至兮足魁魎而生龍蛇爾名為魚厥
號曰蠹無鱗鬣以自衛不潛淵而躍渚披景慕之虛名
蘊蠶食之邪慮天壤之間充汝腹者多矣尋茫茫之墜
緒幸不為人之害兮唯簡編之見惡信黃卷之有味汝
得幽潛而饜飫豔輕碧之微軀兮曳白鬚而容與曾賢
愚之無間兮輒遇之而必妬誰謂汝無牙兮何以穿予
之竹素紛篆籀之紆屈兮致篇章之脫誤啟散帙而撲
滅兮念忌器之善喻採春薺之纖葉兮雜芸芳而細注

恐物感之有驗兮庶噍類之一去曾少力之不獲兮愈
滋蕃而無數汝豈學道之人兮咀糟粕而未悟將生死
於文字之間兮凝精思於朝暮不然秦李斯之徒兮師
六經而依據一旦燔之而叛道兮俾黔首而聾瞽流餘
孽而見化兮終宇宙而惡著聖防謹其萌芽兮堅冰凝
於霜履苟不處而不驅兮恐齧缺而無餘也布我牀榻
汎我庭宇亂牙籤於風中趨秋陽之烈馭既不能全湯
鼠之殛裂兮以炎暉而為治其藉流爍之熾焰兮書難

為之一杼燬醜類而莫逃兮遞靡喝於諸部失餘浥之
所在兮斂炎光於書戶齊潔竹書之簡森列周宣之鼓
固我扁鐻若有神護喜卷舒而無恙殆遺亡而見補既
收書而入室遂慨然而懷古彼微蟲之蠹書尚為害而
斯巨吁姦邪之在朝妬忠直於時主其擯斥危亡之禍
將何如哉嗚呼噫嘻我得之矣噫噫管蔡為周公之蠹
兮幾謗成於王所眇眇子西為宣父之蠹兮化不霑於
荆楚臧倉媒孽為子輿之蠹兮道不行於東魯上官媚

嫉為屈平之蠹兮賦懷沙於汨浦匹夫絳灌為賈生之
蠹兮老長沙之一傅孫弘變詐為仲舒之蠹兮策不施
於漢武恭顯讒慝為蕭傳之蠹兮致災連之中阻封論
小人為鄭公之蠹兮太宗幾以刑而為務盧杞姦邪為
真卿之蠹兮卒糜軀於賊虎逢吉陰險為裴度之蠹兮
播緋衣之訛語蠹兮去之而不可疑兮尚拔山之固兮
况任遇寵信迺為忠直之輔兮奮筆成文吾為此而懼
兮

祭諸葛丞相乞靈文

維大元至元八年歲次辛未九月壬戌朔某日承事郎
前監察御史衛人王某敢昭告于漢大丞相忠武侯諸
葛公之靈嗚呼事有曠百世而相感者以道義故也維
公挺天人之資奮雲雷而起黜功利之邪說明剛健之
正體攘伏羣陰嗣興漢紀兩立偏安幽燭厥理茲少康
克復之本心何戰國縱橫之可擬由是而觀公之志何
意於鼎足而峙也至於開誠心布公道從權制示儀軌

牧民訓兵賞善黜戾以君臣大義而言乃忠武開濟之
餘事也宜魏人畏之而如虎走狐狸而號魍魎偃回旆
之威靈嘆竒材於壁壘故三代而下巍然王者之佐惟
公一人而已繫一介之凡庸何清光之敢企然揚洪蜀
郡之功曹楊顯幕府之屬吏肆一言而表擢感忠規而
隕涕又如李平廖立以過見廢俾之怨艾固匪遐棄及
夫蜀婦既髻痛吾已矣恨終左衽發憤而斃是又見公
不屑與新之教采葑采菲之意無以下體而為累也若

憚也質朽才疎有志未遂年迫知命動昧操履踴跚仕
途幾年于此八月行臺僅免官謗三年御史莫吐其氣
今則俟大治之甄陶聽鼠肝而蟲臂雖耿耿以自信復
何為而何逝恐生無益於人死固聞於世也用是中夜
慨歎不遑寤寐乞靈祠下陳詞而跽我公在天日星昭
緯容光必照奚間彼此思蛻濯其塵穢叩囊底之餘智
覲增益其不能為砭鍼其頑鄙付清明於眇躬極臣子
之所止有來厥修神所惠祉庶免夫年與時馳意從歲

易悲歎窮廬遂成枯萎逼逼之懷竟無及於追悔也尚
享

為虎害移澤州山靈文

大元國至元十二年九月日承直郎平陽路總管府判
官王惲近被藩府檄伐石東鄙有以虎害言者謹移文
以告澤為州當太行心腹間傍雖長林巨壑獸蹄所交
窟宅所在然鳥獸陰類神寔主司陰禦默捍限隔常處
制其暴厲使無犯越以為人害此神之職守吏之責也

今不逞之獸悍然不安其所安食其所不當食怖農耕
梗行路啖民畜膏肥厥身以孽乳其遺類亂區制之常
經忽天府之命吏是將與吏民雜處此土方今聖賢在
上世道清夷政令簡肅年穀登盜賊弭守吏者承流宣
化牧養斯民為任坐視若此安能俛首降心偷安朝夕
容此物橫重念民之於國備犧牲粢盛供天地百神之
祀出兵賦芻餉佐軍旅征伐之用重繁若此幽明兩間
敢不敬忌以顧卹邦本且民又未嘗輒犯於彼彼胡為

而然哉若曰妖孽之采蓋有由然祗吏之不德政有不善自有任其責者奈何禍延平民使居者行者惴惴焉懷旦夕不安之恐一至於此哉即欲窮幽致討勦絕而後已殆禽獮草薙等耳然神不於其告輒從事於彼是守吏不有其神此文告所以先也維神聰明正直念守吏克虔之告思職分當然之理赫靈威迅符牒搜索亮渠斃諸原野餘則鞭笞驅逐遠放林壑限以常處永絕斯害使一方安靖遂田里有生之樂雖神之職也實神

之惠也惟明靈其圖之

瘞畜犬文 有銘

犬之於人有功矣晝則守禦夜則警盜其健則能搏物
猛則能取威窮則不遺其主靈則不失其家茲犬德之
大率也予有畜犬曰蒼頭髯旣被體眈眈然有獅猛之
姿誠猥髦之上品也其為德則不貪饒不舐穢不虛吠
不狂遊寢有常處履擇其地投之物非啖之不敢齧叱
之退非招之不敢前至於親屬賓客一及於門牆者聆

其聲亦能識其人指揮馴狎咸會人意可謂有人性而無狸德矣嗚呼物之生稊而壯壯而老老而病病而死順常理也主人何憾焉且計其歸于我以至於死蓋十有一年于茲其服勤守禦功亦多矣主人惻然而興命童子具畚鍤裹以寢簣枕用玄石瘞於古堞之下亦弊蓋不弃母使首陷之義也記曰捕田鼠者祀之矧犬有功於人也昭昭矣故係之銘其辭曰

嗟嗟竒狉穠髦之種曰守曰禦或靜或動靡失其常風

鳴意聳卧護我家取威于衆相非狸德爾馴且勇唯有
稱德與良馬共生也服勤死當禮送弊蓋之義敢不是
奉

諭平陽路官吏文

為判官初任時作
時九年五月也

契勘國家張官置吏本以為民且縣而州州而府吏而
官官而長雖上下分殊大小職異以承宣而言實為一
體至若親臨民事周知下情如賦稅課程婚姻良賤債
負田宅刑名等事推明根源分別曲直兩盡物情一歸

于正為莫若州縣耳故諺有之既為民父母當作子孫
看此言雖微可以喻大恐不當憚其煩勞一委於吏致
開塞倖門情生詐起附會科條高下其手富強恃勢者
理本曲而返伸貧弱冤抑者情久鬱而固訴事體既乖
勢成稽滯及愬者有辭莫可推延仍作疑似上之于州
州司設有規避事情捨難趨易艱於勞心者止憑縣解
略不詳審輒上於府者有之易而有謂者一委胥吏聽
其飾說亂行剖決者有之謂如按驗未完辭情稍備或

明具條章不行定擬冒亂上陳倖其萬一者有之又念
徇情同列者視違錯而不言既滿望代者以患失而為
慮至於辭不清明而曰民囂於訟身不力行而曰事墮
于下以職以分何不思之深也總府固當持大綱畧苛
細不宜求痕洗垢以察為明然念軍國之利害刑罰之
枉濫脫或差悞而總府亦不敢止守大綱究其所以自
有任其責者矣至若總司行有不逮虧一道之紀綱亦
何以逃朝廷共理之責乎又念郎官上應列宿苟非其

人百里受害靜言思之可不畏歟稔聞公等類皆明直
恪勤官政小則寄百里之命大則近連率之職天官天
祿實荷恩榮獨有履正奉公竭盡心力以功名圖報上
可以答國家委寄之恩下可以塞為民父母之望噫社
稷人民莫非王事視如私家無不修理推廣此意又何
俟告辭之丁寧公移之督責也自今以往計能強其所
當行勉其所未盡以一體為心共理為務遠懲積習作
新斯民使一道元元霑被王澤而遂有生之樂實公等

之力總府敢叨其功乎所以集衆思廣衆益者惟期王
事有成則總府亦庶乎其寡過矣

敦諭百姓文

汝等性秉五常智周品物聞善必遷知過速改此汝固
有之理恒久保身之道也方今明教化勸農桑彰善癉
惡為務庶爾有衆比屋安然遂有生之樂此明天子之
意也平陽陶唐故都詩書遺俗世不乏德比者自遠思
之化陵夷衰晉之風尚氣亢強頗乖正理致使訟牒囂

繁動經歲月較其所爭至甚微眇親舊變為仇讎畎畝
棄而荒穢事端既起歲計一空亟當戒者乘氣窒塞不
度輕重果於自殘禍延後人嗚呼一忿輕生乃至於此
非愚而何況朝廷委付守臣之責非特有司常常而已
正以承流宣化美厚風俗安靖一方為重兄弟弟夫
夫婦婦恩義至篤也不可因細故而致爭比鄰共里連
鄉並黨緩急相恤也不可以小忿而興謗蓋好鬪者喪
身之原健訟者破家之本興言及此我心悲傷汝也何

心忍於為此常念禮讓者安順和睦之方孝悌者福澤
富厚之本一日自新終身樂地能爾何止公庭致東杖
之清田里獲共安之樂將見祖先神靈安於上子孫德
澤流於下比屋雍熙永為善俗豈不快哉豈不樂哉據
教諭社長耆舊人等請以此意敦諭中外使咸知勸戒
毋重其改作也其有不待教率自來孝悌勤儉力田而
省事循理而畏法者申明上司別加顯異若克頑如前
恬不知省上違總府之訓辭下悖父兄之忠告是亂常

敗俗之人國有常刑悔將何及至於有司非橫以侵牟
豪強兼弁而為事科差不均力役偏重縱而不問以致
失宜使汝下情鬱抑控告無所是總司撫字無方得罪
於汝將何以息閭里愁嘆之聲朝廷共理之責乎汝等
其詳思毋忽

勸農文

切惟民生之本在農農之本在田衣之本在蠶蠶之本
在桑耕犁耙種之本在牛耘鋤收穫之本在人人之本

在勤勤之本在於盡地利人事之勤地利之盡一本於
官吏之勸課夫田功既盡縱罹水旱尚有所得仰事俯
育迺克匡生穡事不勤雖值農穰終無所獲賦稅飢寒
將何以濟由是而觀克勤者身之寶自惰者家之殃此
勸課所云急也提刑按察司欽奉聖旨所至勸課農桑
使職近緣巡歷考照簿書其耕播栽植之事勤惰勸率
之方大抵虛文多失實效勸農之官長民之吏安得不
任其責况今春首農事方作巡行勸勉適在茲時仰所

在有司照依已降條畫徧歷鄉村奉宣聖天子德意敦諭社長耆老人等隨事推行因利而利察其勤惰而懲勸之所有事條開列如後

一如田多荒蕪者立限墾闢以廣種蒔其有年深瘠薄者教之上糞使土肉肥厚以助生氣自然根本壯實雖遇水旱終有收成若無閒田此最良法

一穀麥美種苟不成熟不如穧稗切須勤鋤功到去草培根豈不聞鋤頭有雨可耐旱乾結穗既繁米粒又復

精壯此必然之理也

一二麥可敵三秋尤當致力以盡地宜如夏翻之田勝於秋耕犁耙之方數多為上既是土壤深熟自然苗實結秀比之功少者收穫自倍

一所在水利常令修葺毋得因循廢棄倘遇旱乾獨沾豐潤是地利徧惠一方人力可不加謹又無此係朝廷最重之事切當用意仰體至懷

一桑麻之務衣服所資切須多方栽種趁時科孳自然

氣脈全盛葉厚稽長飼蠶績縷皆得其用又栽桑之法務要坑坎深潤蓋桑根柔弱不能入堅又不宜拳曲難舒根既易行三年之後即可採摘

一蠶利寡博養育實難如浴連生蟻初飼成眠以至上簇必須遵依蠶書一切如法可收倍利嘗聞山東農家因之致富者皆自絲蠶旬月之勞可不勉勵

一耕犁之功全藉牛畜須管多存芻豆牧飼得所不致羸弱以盡耕作其或引重服勞使長有餘力若有羸老

不堪者切須戒殺勿擅行屠宰

一鷄豚鵝鴨之屬菜果瓠芋之類皆可養人務須繁畜
廣種用之接間不為無補故古人有言菜不熟曰饑豈
為細事

一時至物成罷亞壟畝更加併力收斂以防風雨損壞
有失歲計不惟盡廢前功一飯到口自行暴棄良為可
惜

一古人蓄積寔為急務故國無九年之蓄國非其國也

如平陽太原兩路例有蓄積往往山下饑荒鮮聞山上失所近日官設義倉正為此也蓄積之事其可後哉

一織紵紡績責在女工可諭家長戒其慵惰嚴立程限造成端足以備粧著蓋非鳥獸必須溫煖可禦冬寒若無衣褐何以終歲

一或有頑不率教惰農自安背本趨末敗壞淳風朋游羣飲稱曰事情釀酒屠牲指為口願田務方集耽樂城市其或別生事端遭值官司父兄親戚理須營救豈止

破壞家產田產轉成荒廢此等切當禁治毋得輕犯
一有孝悌力田為衆表率汝等舉明到官優加寬恤如
有浮泛雜役可除者即為蠲免以勸餘人

據已上事條仰社長耆老人等各於當社時時開陳隨
事推行因利而利察其勤惰而勸懲之不致因循苟且
徒文具而已庶可以作副朝廷愛養元元務農重穀之
本意也除已暗行體察不如教者須議省諭各令通知

勸農詩

總勸

分司勸課不辭頻汝但聞言日克勤倘使有名無實效
到頭俱是具虛文

糞田

年深蒔種薄田疇糞壤頻加自昔留田果糞餘根本壯
縱遭水旱亦豐收

種桑

年年勸汝盛栽桑相度田園土脈長屬汝一根如法種

明年要見百根長

勤鋤

鋤頭有雨潤非常此是田家耐旱方
果使鋤頭功績到結多得米更精良

水利

細思水利最無窮普例灾傷獨歎豐
倘有可興須舉似已成毋得廢前功

女工

田家門內事紛拏最緊蠶繅與績麻主戒婢奴姑勸婦
趁時作活可成家

訟田

近年田產貴於金明見無憑恃力爭縱使一時官錯向
就中不直有神明

結親

成婚作贅結歡情徃徃年深致怨爭省訟有方渠記取
始須書契兩分明

讀書

孝慈和順革器愚說似兒孫自讀書縱不盡為官宦去
省心解事亦良圖

省訟

典田賣舍屬曹司何似無爭省狀詞唆汝致爭原是賊
勸令和忍是良師

畏法

禁網寬疎固不苛慎毋輕犯被拘羅更思有理無錢語

試估家資有幾何

屠宰

上司禁汝莫屠牛間有人來告事由豈止到官刑罪慘
怨讎相結幾時休

鬪毆

農家蠶務與耕田除却耕蠶半是閒利害不多休致鬪
壞錢當罪片時間

教唆

教唆冤報似循環比及兒孫已被愆若欲人生求利遠
正須良善養心田

盜賊

一毫非有莫萌心竊物穿窬罪不輕重是杖徒微刺記
枉因纖芥壞平生

飲博

常思羣飲與攤錢此事尤須預禁闡酗至輕生輸到盡
恁時雖悔恐應難

安分

貧須藉富富憐貧安分懲貪德自新積取餽糧防儉歲
慎無相率去祈神

天報

四民唯汝寂純風天憫辛勤報已豐試看仕途青紫客
大官多半是莊農

終勸

分司勸汝事多忱今歲詩篇意更深切把此詩長記誦

來年比勸預關心

又

文告裁成二十詩篇篇皆出老農辭汝歸相勸行毋怠
便是分司樂不貲

祭文

先祖妣韓氏祭文

中統元年庚辰秋九月丙寅朔十有一日丙子男孫某
等謹以清酌庶羞遣奠于祖妣韓氏之靈繫韓氏先昌

黎之裔枝分派析散處於衛衣冠煌煌文經武緯越宋
有光司空之貴彈觀其譜本支十世猗嗟祖妣實出其
系薰沐膏腴生大盛世德婉柔嘉主夫中饋貞祐初元
金兵四潰萬室一存危若旒綴時維祖妣歸于王氏內
助我祖畢力家事遂濟坤柔外扶貞義我堂復構我祀
復繼內治雖嚴舒而脫脫我祖先歸我考時穉勤苦流
寓栢舟自誓鞠養提攜遂成偉器名甲京師一日騰沸
抱飴諸孫免夫火水至克負薪其恩非細欲報之德昊

天罔既八十之春不為早世顧孫不孝榮養殊替有銜不
祛涕泗面被庚申之秋應辟東魯募辟幕官唯曾是主
慮其不淑庶獲奔赴罔遂所求心不遑處后土皇天實
聞斯語旬日之間事易其故天誘愚衷駕言西騫拜省
庭闈病為少愈九月初吉星河尚曙有物告終聲動軒
戶奄奄在牀彌留不去日薄西山矯首云暮風樹之悲
有淚如注盤盤新阡實惟高原安之妥之一遵訓言傳
家之範敬奉周旋左配我祖何千萬年嗚呼尚享

廣平郡夫人完顏氏祭文

懿懿夫人金源之裔分派天潢坤柔所萃式承陰教婉
其令容作配德門被之僮僮蘋蘩主饋化成肅雍孟母
之訓伯姬之恭是嬪是則以號以封立人之道莫嗣續
大子挺儒宗種德孔邁令伯陳情不仕而憇菽水盡歡
心乎日愛素髮垂領斑衣在身問安眎膳眷然晨昏野
服瀟然林下之秀蘭玉盈庭歲時上壽日薄西山其明
則東曾是微恙而不及躬起居燕樂洩洩融融彼高明

家具慶則那若母若子為壽如何親不知憂孝養終天
享此全福幾人則然懿懿夫人足慰下泉膺膺周原瞻
氣葱籠居河之湄有儼新宮臨拊無憾哀以送終懿懿
夫人為婦盡道為母有儀彤管有煒千古是徽尚饗

祭王叅議文

維中統元年十月甲寅朔二十一日甲戌王惲謹以清
酌之奠致祭于參議先生之靈藹藹王公維德之宗教
子以義從師于共走也何幸而與點同氣質一變舞雩

之風文士輩出繫先生之功出來典衡粵惟八年興滯
補弊政有後先激濁揚清巨細不捐樂育之心有加于
前士感公知所立卓然顧惟不肖獨有二天每侍几杖
接以溫言意向所在多文字間一意作成汝其勉旃家
貧親老擇我祿仕牀下之拜言猶在耳蜀山蒼蒼公箠
西指董菴之別誠發於裏臨岐眷眷告以終始蹭蹬沈
鱗有俟乎此孰為歸來便隔生死痛彼知己世罕所遇
我思古人涕零如雨猗歟先生伊時之麟文彩風流與

道日新既惠我輩亦及我之後人所謂故國非有喬木
之謂而有世臣我我豐碑表公之墳公雖云亡其德在
民太行盤盤淇流湯湯永懷先生何日而忘

祭王府君夫人陳氏文

大元國至元十二年歲次乙亥二月壬寅朔越日承直
郎平陽路總管府判官王惲謹以香酌之真致祭于河
南路宣慰副使王君太夫人陳氏之靈伏以詩稱有基
婦道乃隆易讚坤儀徽柔所鍾維夫人之淑蕪著一躬

母儀女範嫻于六宗內助既裕化成肅雍彤管有煒周
南之風嶷嶷賢嗣總角從容以契以分昆仲猶同二十
年間獲侍左右歲時拜慶稱觴上壽顧畜殊常如卯斯
覆我草惟纖兄蔚蘭樹突而弁兮載同庠序浹洽薰陶
亦叨時譽調官南歸四月惟夏升拜北堂德容甚暇親
哺之食手飲以筯駕言西行辭拜床下中心惻然誨言
灑灑日薄西山衆鷗飛翻云別幾何遽棄榮養聞訃驚
怛怒焉如喪英英白雲太行之上有淚盈睫悵然東望

嗚呼適去則順其生也榮較丘山與華屋終哀樂而殊情懿懿夫人壽踰八旬祔安玄堂慶流後昆是足以慰下泉而釋悽愴於蒿焄也悼以官守有限固獲駿奔既不及撫棺而與謚繫昔賢兮擬倫以陶侃之忠順知湛君之聖善以不疑之平反審母氏之慈仁援例私議寓哀於文庶幾薦微誠而告精魂也尚饗

禱雨蒼谷神祠文

去冬今春厥旱斯普比聞三方既禱而雨維此衛邦和

氣艱阻草木焦卷種不入土致此咎殃誠守吏不德之
故也吏不稱職罰及一身我民何為罹此旱凶嗟嗟四
民寂苦我農止食其力歲期一豐年苟成災散而西東
恭惟明靈蒼水之龍哀憫慈惠正直明聰司我雨部山
靈是宗瀕彼淵池雲雷之宮民以病告禱輒感通忍以
吏不稱職卒莫救其隆蟲哉願迴哀眷澤我邨鄙乃以
有秋祀事孔終

祭王叅議文

代史運使作

惟公奮迹渤海應期挺生婉畫長材廓時之清佐我父
相幾三十年子惠兵民以謀以旋長淮百戰松漠逾邁
死生以之而有公在矯矯大節老而彌堅襟融宇粹秉
心塞淵中年之仁平陽之賢哀哀衛民賴公以痊膺膺
周原熙然樂土公雖云亡其政則舉走自恒陽來寓南
鄘瞻拜遺像齊之蓋公歌詩知政泱泱大風民懷遺愛
甘棠是比士而感德曠乎百世矧伊嗣侯義同昆季嗚
呼哀哉弔罔及哀生不獲事遐想音容河岳流峙野日

荒荒羣飛搶揚公不少留使我涕滂跽而陳辭真此一觴尚饗

春旱禱諸廟文

旱自去秋極於今春滌滌衛土如惓如焚夏麥已槁曷
休我民秋種不入饑饉荐臻旦夕惶懼不知所云恭惟
明德守臣所欽民以病困神心孔仁用是齋沐以祈以
禋庶垂哀眷昭鑒微誠風伯回馭山川出雲一變盪氣
化而甘霖秩我東作庶幾西成載謁祠下冀荅鴻靈尚

享

七夕祭竈文

至元乙亥平陽府作

三代之制五祀孔修羣姓時享或春而秋欽惟竈靈並
與而幽朝烹夕飴一家所由火水相德乃神之休敢致
薄奠于陘之周有肉如玉有酒斯柔味登于俎香列于
卣匪物將致匪媚是求久矣斯禱庶荅神休尚享

七夕祀竈漢俗也世久不用獨吾家行之多歷年所且
前人致恭或祈苟得此非予之心也蓋庖福飲食所出

五祀神為最尊薄官已來餬口四方是神即予主予乃神之客也匪朝伊夕不無溷穀膠撓之瀆惟神念客之故庶有以安之用伸告謝以答神休尚享

謝龍神文

維至正四年歲次丁卯夏六月丁巳朔廿日丙子翰林修撰郡人王惲謹以香酒之奠敬祭於縣西平成鄉龍公之神矯矯神龍柄雨之機亢陽為灾非雨則饑士而力農乃分所宜惟百創理一旱則隳霈澤在天屢及我

私疇敢不祇若神之威德也尚享

全
文
集
卷
六
十
二

卷
六
十
二

秋澗集卷六十二

欽定四庫全書

秋澗集卷六十三

元 王惲 撰

祭文

告家廟文

維至元四年歲次丁卯六月丁巳朔廿三日己卯孝曾
孫王惲等謹以香酒時果之奠敢昭告于曾祖考府君
曾祖妣臨清呂氏顯祖考修武府君先祖妣孟氏韓氏

皇顯考忠顯府君皇顯妣夫人靳氏之靈先以丙寅歲
十有二日為子公孺聘婦得宣慰石君之第三女茲者
往之女家躬展禮幣令龜告吉日維斯時廟授有儀式
伸虔告尚享

祭元神祝文

歲次丙辰九月戊戌廿九日丙辰臣某等謹以清酌庶
羞之真敢告于歲德之君惟神一歲之君百臣是統端
臨異位獨秉威權悔吝灾祥維神是與臣某父某年踰

知命心切齊家動靜之間既乖攝養公私之際尤重愆
違而又庭戶積殃子孫不孝於七月廿七日遽嬰末疾
將抵時冬困致沈綿力疲舉履日因元命躬薦愚衷幸
冀神明蚤躋和豫尚享

告家廟文

維至元四年八月丙辰十七日壬申孝子惓忱等謹以
清酌百羞之奠敢昭告于皇顯考忠顯府君顯妣縣君
靳氏之靈嗚呼哀哉維丁巳歲八月至今年丁卯秋仲

府君捐館十週星矣實至元四年秋八月丙辰朔十有八日癸酉也十者數之盈天道之小變也祭法以春秋享奠蓋因其氣之終始而致思焉矧履霜露瞻拱木歲月近紀親日愈遠得不極其志而重其感傷乎今之所謂道供豈古致齋饗親之意歟茲者爰即正寢敬演靈章庶仗真詮以證妙果神維格思式伸虔告尚享

至聖文宣王奉安祝文

於赫元聖萬世作準曰義曰仁風化之本顧瞻清廟曠

茲有年咎將孰執廼吏之愆爰自下車心弗遑安靡朝
匪夕載經載營誕彌八月厥功告成奕奕新廟桓桓旅
楹峻以文階重以神幄有翼有嚴乃丹乃雘爰居爰處
以清以寧神其格思享茲菲誠爰暨厥民日焉啟迪仰
止瞻依聿修厥德庶幾報本以謝不職尚享

充國公奉安文

伏以庶工告成新廟孔碩於穆素王之亞聿陪元聖之
居仰底攸寧永欽厥祀尚享

鄒國公奉安文

伏以有嚴閔宮載新祀典仍增光於肖像永配享於神
庭於穆維清尚安且妥尚享

辭墓祭文

維大元國至元九年歲次壬申四月乙未朔十七日辛
亥男孫惲謹以清酌之奠敢昭告于曾祖王父顯考王
府君之靈惲自至元五年冬十月被召赴臺九年春用
前資翰林修撰由監察御史改授承直郎平陽路總管

府判官已擇此月十九日赴任所今當遠離墓次伏冀
明靈特垂陰祐尚享

祭孚惠神祠文

六月十四日祈雨至十八日申
刻大雨至十九日黎明方止

惟神淵懿徽柔德配乾方感沸其泉實為淵浸屋而祀
之禮固宜矣茲者時雨愆常蒲絳兩州旱暵頗甚吏實
不職民將何尤夏麥勤而半成槁稼噓而可燎衆仰一
溝之水待為卒歲之安然得之有限溉之不齊與其施
及乎有數之田何若膏潤夫一境之內惠卹哀憫繫神

能然伏望起伏龍鞭電轂神泓為之變動川雲隨而翁
從細挹天瓢溥霑壠畝使槁者勃興而如握熟者得濯
而輒醒雲漢昭回一條蘊隆之氣甌窶滿載卒成大有
之年神能鑒茲敢忘昭報尚享

祭耶律丞相文

大元國至元九年歲次壬申六月丁亥朔初八日甲午
承直郎平陽路總管府判官汲郡王惲謹以清酌庶羞
之奠致祭于有齊忠臣大丞相咸陽王耶律公之神伏

念憚以監察御史叨承郡幕視事之初來讞茲獄求情
罔獲非神疇依惟神心秉塞淵氣餘忠謹始焉義合於
神武終以威馳於栢壁生為良弼歿為明神對越英靈
凜然如在以德以功宜永嚴祀憚授館絳園迫近神廡
號呶朴擊不無震驚然兇悍禍賊寔神所憝尚矜不逮
俾集厥事式伸明薦以克來享

康澤王廟謝雨文

憚訊獄絳陽回經太平百里之間秋禾如槁物之生植

時方尚養民之告病不能不動俾驕陽亢甚耕隴塵翻
誠守吏不職之所致也近雖致禱於鼓瓊行復展誠於
祠下及次襄陵油雲四興甘澤霈作郊野灑然溥獲沾
足且神化無方龍德為大山澤一氣初無間然雖愚衷
適與之會寔神顧卹而惠之也用薦明禋以答靈貺尚
享

拜奠夷齊墓文

維大元國至元九祀歲玄默涸灘冬十二月既望承直

郎平陽路總管府判官王某恭以牢醴之奠致祭于孤
竹二賢之墓嗚呼天下有當然難舍之事惟特立者能
成之天下有至中大正之道惟齊聖者能明之三代而
下建天地之極定君臣之義揭若日月亘萬古而不息
者其惟二賢而已壬申之冬某以守吏按事蒲坂仰止
高山其立卓爾所謂聞凜凜之風者貪夫廉懦夫有立
志也趨拜几像山烟四起奠以牲醪若恐將浼有薇在
山有粒在簋潔以馨誠薦我明水尚享

祭黃崖山神文

節彼南山真安一方爰產竒石紫質青章王宮繕興爾
焉來營伐而材之不無震驚用是昭告惟神降寧庶憑
默佑迄用有成尚享

謁西岳廟文

維神德媿坤維氣涵崑潤際四海洪荒之內位實雄尊
在提封密邇之間禮當趨謁仰止三峰之峻來伸一禱
之誠僥倖之求斷不敢萌憂戀之心庶幾昭鑒爰生申

甫來佐明時，冒瀆顯靈豈勝悚。惕尚享。

安二賢神文

某以壬申之冬來拜祠墓，悼其傾圮，几像暴露，載經載營，今也告成，睽彼雷首肅焉。神庭繫二賢之德，聖之清兮，以孔聖之哲，極所稱兮。揭若日月，何廟貌之尚兮。封而匪屋來者，何瞻仰兮。蒼煙喬木，何山爛其光兮。盤非周粒，桂酒苾其香兮。神其格思，歲永此而康兮。

肇祭霍岳文

大元國至元十三年歲次癸酉六月壬午朔二十有六日丁未承直郎平陽路總管府判官王某謹以牢醴之奠致祭于霍岳中鎮應靈王之神維神峻秀靈異鬱為鎮山冀州之野嶽麓所盤致興雲雨祀典載新報本信敬茲焉其辰顧維守吏歲奉嚴禋籩豆孔修敢告駿奔乃祝之曰高宜麻麥兮下宜稌蛟蛇結盤兮物不寐王事庶集兮神所與

康澤王廟祈雪文

大元國至元十年十二月己酉朔承直郎平陽路總管
府判官王惲謹以清酌之奠敢致禱于康澤王之神伏
念一冬三白歲事之常今者云暮未覩其祥寒律徒切
風埃瀕洞宿麥雖萎猶含餘凍載憂載忡春疫為重彤
雲油油既合而收和氣致盤政或未修吏實不職民將
何尤惟神降鑒一雪孔周灾沴不作惠我來牟吾儕小
人敢後神休尚享

祭靖應真人姜公文

大元國至元十一年歲在甲戌二月戊申朔十有二日
己未承直郎平陽路總管府判官王某謹以茗果之奠
設祭于靖應真人姜公之靈某以中統元載列職省郎
得掌綸命帝遣使臣奉宣詔旨起公於晉有遐想仙標
載勤驛乘之語眷眷之意何其隆信者哉逮明年春獲
拜下風寶玄之宮野服黃冠道淳德沖曾無一言及乎
本宗其揄揚稱頌若恐隕越者堯舜禹湯文武之道之
功建祠奉祀竭夫一躬退而論思豈墨名而行與儒同

者耶及官平陽載覲儀容振袂談舊一沛平生之胃愈
知靖專之性精誠之德足以動三河而沃淵衷也云何
一別上仙三峰杳黃鵠其何邁將神游乎太空天藐雲
高涕泗無從過故都而眷戀庶斯文之可通尚享

兵次孟津祭靈源王文

維十有一年甲戌夏五月丙子朔越七日壬午承直郎
平陽路總管府判官王某敢昭告于靈源王殿下我國
家將有事於南服桓桓兵甲例作于晉顧予小子實總

其一焉今茲南邁前次河壩尚克顯相其安以濟豈惟
可免簿責誠以威靈陰隲以先啟行之力也尚享

祭平陽府東城門文

維神職司啟閉氣積陰凝今者淫霖為祟已及浹旬害
彼深盛動妨民作伏望導迪陽和遠成開霽尚享

祭臯陶文

憚以到官四日奉憲部符鞠絳陽獄大小之情心敢不
盡恍惚曖昧有不可致詰者使讞議適當生死兩明愚

衷不逮神惟能誘之寃滯沈痛捶楚之下求而不獲者
神惟能伸之伏惟明靈尚克顯相

中元節祭三代告生孫汾郎文

伏為男公孺新婦石氏於今月十有二日辛巳生子名
曰汾郎蓋人倫之事繼續為大因時以享式伸虔告庶
憑神佑其安且宜尚享

立社稷祭告文

維神五土之祇百穀之本血食于社萬世依準禮墜而

興張本自茲牲醪香脂鼓鐘清夷迄用康年神其妥而
維神百穀是長萬民之天配食于社古莫能遷名存實
亡乃吏之愆張本于茲神其鑒焉有酒斯旨有牲肥鮮
維神格思歲其有年

范陽房族祖九翁祭文

維至元十三年歲次丙子冬十月壬戌朔十有八日己
卯房孫謹以清酌少牢之奠百拜致祭于故軍資府君
族祖九翁之靈嗚呼哀哉十二年春予守官平陽祖母

慕容氏書來以公訃告國有常制莫敢擅離然聞母弟
忱自疾亟於引柩納壙皆與及喪次雖不獲戴星奔赴
中為少遑也越翼日即縞素為位於府北郊之僧舍發
哀以祭婦推氏子公孺新婦石氏在焉感不視事者五
日迨今年春三月秩滿東還將為指日即路得哭墓而
唁親老也復為中書檄去考試河南四道滿三月而歸
日月逾邁霜露之感積諸中而至于攸久也如是曠慢
不恭之責將何所追今茲之來駿奔露處不遑安者凡

十有四日含凄茹辛實以祭告為事伏惟神靈鑒茲哀
悃嗚呼哀哉尚享

祭中書左丞姚公文

聖維天開寵綏九有必誕賢輔以左以右手幹機衡代
天旋斗伊公挺生奮迹營柳長白之英遼江之瀏元氣
網緼鍾此靈秀脫落俗學沈浸道圃姬情孔思伊淵洛
藪一物致知千古尚友起而翼漢雲雷交邁啓沃淵衷
達聰續黻至元之初公縮機紐謀謨廟堂股肱元首職

分六卿網維結糾帝載用熙豐而不葑大明黜陟罷侯
置守萬鈞機張賴公克毅霖雨一濡載清宇宙我武維
揚荆襄恃久大闢屯田櫛比糧糗公善開物務深耕耨
豳風良耜十千為耦繼倡農司萬邦是揉明彼王道始
夫南畝護軍來歸雪髯垂脰長江失險萬介北趣特置
館筵體貌耆耆眷我儒臣甘盤之舊天理人私自公判
剖國勢民機倚公安否有辯懸河而惡利口四海具瞻
漢更高叟龍光稠疊玉鬯拒貞望公百年以佐元后胡

不慙遺梁木壞朽彼蒼悠悠莫之能究嗚呼公之為學
知所先後味道既經太羹玄酒平生游藝組繡雕鏤公
視餘事為世瓊玖公之逢辰道合非偶來儀舜廷台鼎
鳳雛揚歷中外足展抱負八十之春已極眉壽考終牖
下載啟其手有子承家公復何疚嗟吾道之如綫念後
學之孤陋與斯民之不幸孰思濟而云救憚自束髮辱
知竅厚拔擢提撕兩端親叩至登瀛州再承善誘弦晦
一週玉堂清晝今公云亡此會難又情悄悄以填膺淚

浪浪而霑袖今也送不遑執紼葬不得撫柩寓哀斯文
為一觴侑尚享

故尚書禮部郎中致仕丁公祭文

嗚呼維至元十三年夏六月憚考試河南拜公牀下留
語終日言不及私維是治之隆汙民之殿屎法具未完
涕下漣而至於庶於律已老而知止教子以義方勅斷
家事其在倫列如公一人而已此天下之公論非予得
而私議也區區之誠幸惟鑒茲尚享

故吏部尚書高公祭文

至元十五年閏十一月十一日大雪中拜奠

惟中統壬戌之春憚以事累退耕于壠畝者再罹寒暑
既而擇御史開憲府人文之選公以予主不肖誤蒙公
知擢置言路三季裏行我盼我顧豈惟使之增先迄薄
用于今者實公之載舉及官平陽公判吏部不以契濶
怜我椎魯每借譽於時人為聲勢之一助是又見公終
惠且勤不我遐遺之故也至於雄文大冊忠規治具三
峽秋濤危波砥柱茲公論之有在匪鄙言之能喻念公

平生藹藹德度霑馥於蘭臺悵歲律之已暮敢以受
知丁巳之私抒予哀而告公之墓也神惟有靈鑒茲誠
素尚享

外祖安陽縣丞靳公祭文

十五年後十一月十五日

惓年垂髫省識公而蒼髯堂堂山立而異逮予成童受
訓母氏公之世家頗聞一二或官鄉縣或擅科場歷年
五百財雄一方至公而哀亦理之常厥後一紀公歿於
鄉惟嗣罔續我為盡傷春秋時思合食祖傍是用傳訓

子孫奉行公殯淺土幾三十霜棺衾改卜未就深藏娘母雖在顧力弗遑有劣其甥按部洹漳東望堯城心焉靡寧迎置娘母如拜儀形爰念葬事與之經營及茲春首窆公于瑩庶幾畢考妣之志慰安公之神靈也尚期不昧俯鑒微誠尚享

左丞董公祭文

至元十六年歲次己卯九月乙巳朔越有三日丁巳朝列大夫燕南河北道提刑按察副使汝郡王惲謹以清

酌嘉肴之奠致祭于故資德大夫中書左丞簽書樞密
院事贈金紫光祿大夫平章政事諡忠獻董公之靈觀
夫大燕南陸全趙北垠峰尖鬱茂潯池淪淪蟠精萃秀
篤生異人公應運挺出絕類離倫悅敦詩禮感會風雲
奮父祖之餘烈策寇鄧之高勛其志慮良實又濟以武
惠惻隱之仁謙而接物勇見於大敵恭以持已孰知夫
世臣至於肅齊家範友于弟昆忠結主知德庇生民功
愈大而心轉小寵既厚而憂益殷無私蓄為子孫之計

不樹黨收門牆之恩其公亮謹厚又似夫董侍中與萬石君也幾世幾年孕此忠純方沐恩於鳳沼俄星隕於中軍痛丹青之宛轉追畫像於麒麟此非一己之私議在中外哀悼所不忍聞也憚爰自布衣仰公清塵接樽酒於中統之首與賓筵於至元之春每燕語之衍衍顧若揚顯之可賓矧二弟之款曲辱交久而情親雖草宿而罔哭聊寓哀於斯文伸孺子之薄奠庶劔繫於徐公之墳也尚享

遷奉曾外祖殿試斬公祭文并外妣李氏

惟公才德兼備元精孕和早擅場屋三中巍科人文之
譽在公實多正大初元公卒宜津權厝新隴幾七十春
殯而未葬譬彼行人歸不及家曷寧其身茲者日吉時
良奉安祖傍祔以元配永閉深藏魂而有靈以賁幽光
尚享

遷奉安陽縣丞外祖并外媪王氏祭文

憚以前歲後十一月廿三日為遷奉之事已告尊靈今

者應期舉燭永慰幽甦以順從祖以安其藏祔我外妣
闕此玄堂新雖哀宗在公未傷有甥姝以主祀重時思
而不忘是則不必其子而光揚也有牲斯粢有酒斯香

神惟昭鑒歆此一觴尚享

及葬公伯兄孝
思貢士及姆氏

秋澗集卷六十三

欽定四庫全書

秋澗集卷六十四

元 王惲 撰

祭文

祭蒲大夫文

大元國至元十八年歲次辛巳三月丁酉朔十有九日
乙卯朝列大夫燕南河北道提刑按察副使謹遣從事
賈汝霖以清酌庶羞之奠致祭于河內公之靈惟公德

挺羣哲獄清片辭列高第于聖門揚仁風於蒲邑三善之美庸能既耶適星垣有分按之行過神宇致一杯之奠庶祈靈貺以益不能尚享

祭孝感聖姑文

惟神肇迹博靈遇仙漏浦柔懿昭靈作蠶聖母千祀永賴神功斯溥食弗再則飢衣弗製則寔念此歲事惟神其惠顧之尚享

故江漢大都督河間路總管兼府尹史公祭文

幽雪萃氣招搖耀芒合是二者篤生忠良惟公應運挺
出起家朔方奮父兄之餘烈荷天衢而鷹揚武濟文經
為肯棟梁宿一軍於陽夏號東南之精強枳棘非所移
旌鎮襄撫我瘡痍靖我邊疆其惠春雨其威秋霜掇我
殘棄變而金湯復我陂障積而陵岡孰慮鱗介易我衣
裳彼氣日索我師堂堂果上鈞之一載掃敗葉於秋商
每出奇而制勝初不知古人之所長殆羊傳之久駐控
上流於荆襄雖飛渡之無及吳之所以亡者本由此而

用張能回百戰之餘勇效政蹟之章章鬱公堂之佳樹
至今三鎮指為公之甘棠然干將而補履終所用而失
常如憂深而思遠此夙夜之所以皇皇也竟風悲於大
樹奄龍劍於幽藏嗚呼才有餘而用不悉位雖高而志
靡償曾桃李不言而天下為之傷也公常幕余二年倘
徉促膝言笑執手飲觴略吏事而不肅謂國士之或當
茲奉恩綸按部潯陽望龍驤之瑩域能我涕之弗滂寫
平生於此辭庸表公之衷腸噫慟臨江之哭在公則萬

事已矣有子孝繼以後則其流未央神之聽之庶少慰其所望也尚享

祭郝奉使墓文

大元國至元十七年歲在庚辰二月十有二日甲申朝
列大夫燕南河北道提刑按察副使友生王惲謹以清酌
之奠致祭于故翰林學士國信太史陵川郝公之墓嗚
呼甲寅之冬仲月之尾公自杞來道出鄆邳始覲清揚
重於夙契把酒論交突談游藝顧睇回翔吾子可誨臨

別之時一何勉慰維中元春雲龍交際我時游梁與公
再會東館相遇四并同醉所學所行盡發其秘北次龍
岡嘔血而瀉書來及予愈見友義我車北轅公也南逝
自茲及薨凡十六歲追憶平生潛焉出涕公之問學閔
肆汪濊公之文章豹炳虎蔚萬斛淵泉出不擇地太史
與倫皇墳可媿浩浩江漢萬古不廢蘊為忠貞見諸行事
著書垂聲諒非本意匪予得私乃世公議今我想公令
人短氣斯文綫如忍復殄瘁直筆疇歸大冊孰畀偉績

鴻休光潛揚厲而最傷公為國出使初館儀真主成和
計奉持國書以死自誓方介外侮羣狃內掣節落瘴烟
精誠益勵屬國平原同歸一致長星墜芒使輶還轡玉
上青蠅何啻一二惟皇聖明見萬里外錄勞弃瑕予豈
汝罪士無賢否入朝見忌膚慙再行與病交劇一債不
起萬事瓦弃感時懷人憂來拊髀昔賢有言當論我輩
大槩無差節目或滯如公之才如公之志雲夢九吞曾
弗芥蒂俯掇勲名高視一世意廣思長反為物制豈惟

公傷因以自識茫茫大鈞形流萬彙幾世幾年生此偉
器贄用德宗誼逢漢帝百未一施胡奪之易難水淪光
郎山斂翠隱然一丘保之西遂車過腹痛我懷曷既黃
鳥聲悲助我歔歔臨風拜公哭而載酹嗚呼哀哉孤忠
伊鬱幽憂憔悴生罔能伸死而永閔寓哀斯文庶昭枉
昧公如有靈恐予言為知己也尚享

祭武強南龍池神文

維神威洞淵府奮飛天衢致雨興雲執帝之樞顧此冀

野時極焦枯桑半捲而蟲作崇穀出隴而氣未蘇農官
至無可而勸窮民將失所需匪惟吏責恐亦神之所當
虞也况蒼精昏見適時之雩望靈池而致禱庶少全其
區區嗚呼上帝命汝以下衛民居也我當供厥職耳免
吏責而歲有成兢惕之念其敢後諸尚享

北嶽祈雪文

冀之為分方數千里惟嶽峻極于天神奠安之水旱疾
癘神主宰之今者地不藏陽寒氣失序歲律向終未霑

冬澤俾野土不膏宿麥無望春疫將興已足深慮饑饉
荐至民何以生祈穀請命憂人之憂是亦部刺史之責
也縷縷微誠敢用昭告尚享

祭侍講學士竇公文

惟公性極肫誠道深養浩幼學壯行出人意表於周吉
士在漢有道以術濟人方德則小丁巳春識公於沙麓
之墟辛巳夏弔公於肥縣之保憶忝列於瀛洲閱歲華
者再杪世知公漢家之羽翼我以為中朝之元老謀方

膺於理咨憂遽遺於丘禱今也云亡士林悴槁据愁遺
而論斯民有無祿之歎以順受而言得五福終命之考
再拜墳阿奠酌草草顧藥籠之纖微蓋以答平日之不
我少也尚享

丞相史公明忌日祭文

十六年十二月十
九日按部中山府

維公出入將相存歿哀榮公自去世于今幾齡定人思
公雖歿猶生永言不忘曰忠曰貞見之範圍履也大成
勛藏盟府德為世程赫赫堂堂如山不傾定人那知功

被齊民憚向侍燕几馨咳親承今遇明忌來拜神庭感
念在昔依依我情有樂陳列有醑在巽碧草映堦酌茲一

觥尚享

定人像公於西北隅
皆享祀謂忠孝公

史公祭文

惟公德冠羣后望隆漢儀一節四朝知無不為收武定
文綏之畧有金聲玉振之規發至仁於易簣識大運之
盈虧何已私之曾及顓戒殺而為嬉雖羊祜知吳亡而
勸進房喬以征遼而未宜固足與之等夷也嗚呼柱石

巍巍歛然中微風雨震凌帡幪者誰俾為善者嗒然而
若喪變怪者百出而不疑此又世之歔歔而含愴也公
殿是邦尤極恩威峩豐碑於國門宜鎮人之涕洟切嘗
荷公左提右攜豈孺子之可教在卯而翼之之恩大有
濟於艱危及聞公薨身繫情馳曠一奠而如負蓋五年
于茲也今我何幸改畀燕陸歷河山之故封悵音容之
依稀念公平生其能已而公雖亡兮為世著龜公爽在
天尚克念之蓋生而矜其愚曾有以省錄豈歿而知其

來復漫無所維持也追盛德而曷報庶不辱我公之所
知尚享

岱岳祠禱雨文

崑崙岱宗雷雨宅兮良震對代生物仁兮片雲膚合天
下澤兮茲者春霜例災桑柘空兮二麥含實勒將槁兮
秋雖下種不出土兮無褐無糗歲何卒兮衣被饜飫膚
合力兮仰惟岳神其念茲兮憂民之憂而亦部刺史公
之責兮縷縷微誠神其鑒兮尚享

黃石公祠乞靈文

惟公鍾秀崇丘降神圮上靈氣驚世愴莫詰如子房
以韓亡之餘開炎漢之業為帝師之崇其顯授陰翼竟
濟世美者先生之神之功也不肖猥叨時名艾服官事
餘廿年每以昧於事機動成乖戾為愧然非其材而樂
之者有賢父兄故也矧先生之明靈乎至若矜其愚昧
濯其固陋增益其所不能非先生其誰用是乞靈祠下
區區之懷神其鑒茲尚享

修治新阡告成文

餬口四方幾二十載歲時拜掃禮有不逮水泛雷轟未
免惶駭於其事亡不孝之大即此良月躬為修治芟蕪
翦棘增高夷圮補植林空再釐風水郭以周垣隆阿四
起樹門神游題阡表氏揭虔安靈非直觀美功今有儻
以告以祀神之聽之以克永世尚享

韓君大祥祭文

嗚呼王宗韓氏通家往來三十年間情好孔懷矧惟亡

友吾門上第貞幹風生發強剛毅其在諸生先子所器
年近而立歎歷中外臺掾郎曹名聲噦噦前歲之秋告
別何遽曾未越境夢隨川逝日月云邁奄復祥祭論其
受年校夫稟氣老而益強期願可致衆維盡傷去之太
蚤古云五十不為之夭宛彼二雛卓有所樹翱翔仕途
儘持門戶依依孝思以永終譽君如有靈亦足以慰夫
懷之素也尚享

為姓氏告亡妻文

維丁亥歲六月十八日丁丑夫惲謹以茶果之奠告于
夫人之靈推之為姓世不多有故嘗詢其所從出為汝
討論者有年一無所見適讀潛夫氏姓論曰推氏建氏
南氏舒堅氏魯陽氏黑肱氏皆出楚之芊姓者先君熊
繹氏之裔其來光且遠矣嗚呼夫人歿而有靈亦將歆
慰其光且遠者用是不敢不告尚享

中丞王公祭文

大元國至元二十六年歲在己丑二月辛亥朔越八日

戊午友生王惲謹以清酌之奠昭告于正議大夫中丞
王兄之靈嗚呼朋友之重義列天倫切切惻惻疇非弟
昆惟君顧我而我宗君以志則一以分則親如漆斯固
如蘭斯馨而敬而愛久而益新爰自垂髫以及於冠受
業蘇門各伸志願智愚雖殊道則一貫君衷淵塞浩無
涯岸脫畧辭華好謀能斷嘗論士心酬酢萬變如匪中
立鮮不焚亂此予少君餘何足美我時念君大器已見
敦我鄙薄激我愚懦治任將歸而予獨眷繼分使符有

最無殿在昔相度有若昌黎辟佐戎幕大為已知及論
國計莫之與規裴非少韓有崖其間隱忍就事材為實
難穆穆忠武曰伊曰呂桃李盈門多士如雨同升諸公
曰俱是與初疑中舍謂輕所處長屋六曹是為之所自
後騰揚又知所主曰史曰張曰姚曰許交口薦揄螭蟠
鳳翥望君廟堂致君堯禹其經綸國業固足以見君之
器宇彼或無知奚我齟齬淮海歸來道在心小角巾私
第日事墳討周防有餘蛇虺結繳讒火燒城甚於原燎

伊鬱積中不無熱惱嘗切諗予憂世心悄覲閔何多受
侮不少每見慰寬外物一掃擴量沖融致養強矯死非
所憚此何足擾如金在鎔百鍊不撓白首窮塗亦足枯
槁留使咨謀為世儀表此天下之公論非一己之私禱
云何不淑不慙遺此一老吾乃知蒼蒼報施於焉有未
曉者念君問學天人理皦臨終永訣投我腹橐語何琅
琅秋空日杲淚洒行間茂陵遺草哀哀二子越玉陳寶
賢而有文通追來孝所存者長况不為天鍾鼎一事古

人誰了嗚呼事至蓋棺夫復何道尚精爽不昧而來者
是保我奠兩楹腹痛如攪言念平生相期遠到苦樂行
違知者惟鮑悠悠常情異心同貌老夫知音自深痛悼
我過孰寡我履孰蹈有慟無聞徒辟而標淚下河傾寄
茲一抱嗚呼哀哉尚享

路祭中丞王兄永訣文

維君丰度凝遠內明而外閎以予交游之久頗髣髴其
一二其所以斯疾而至於斯者而皆命之所致耶豈用

有餘而嗇於行耶物或犯而隱不校耶欲求合而反得
乖耶翦所愛而戕老懷耶不然何氣運哀謝叢一躬而
蓄耶方謗之興予適在燕嘗表裏乎西溪致一言於諸
公之間力雖微而莫辯庶幾友義盡予心之拳拳用是
生有以書慰之歿有以文誄之又罔以不敏復銘而賁
之辭固斐然思罄亶無愧而已今者執紼徒送永隔泉
路然古人神交罔間存歿臨岐贈言故不憚其再瀆伏
惟明靈鑒茲微悃尚享

御史中丞王公誄文

大元至元廿五年歲在戊子秋八月十有一日前禮部尚書御史中丞東魯王公薨於維揚之客舍友生王惲謹遣子某致奠以不腆之文誄焉其辭曰

顯允王公天姿粹精文辭翰墨外彪中弭年甫弱冠四擅華聲從元問學館申作甥二公提撕大漬于成繼以賓師主善共城始拜公面歡如平生忘年定交實為畏兄青燈孔序絳帷趙廳尊酒文會桐陰滿庭既謁寥休

偉其豪英力薦于上與之同升帝曰汝冕秉心和平乃
眷乃顧詔扈南征潛鱗縱壑天衢何亨一命卿貳尋擢
歷亭改漕京兆以廉見稱擢之提憲以顯以榮褰帷杖
節激濁揚清移鎮三晉八州牧寧載臨恒衛兩河肅澄
霜空千里一鷲獨橫走參戎車戎冠振纓言議甚衍王
事每兢其臭斯蘭其堅斯金兩秩五年愈親愈誠誼賊
俱息王度載貞整我六曹春官首徵再執行憲居中作
丞守以大體與時浮沈西湖激碧吳岫空青公餘吟醉

若慰羈情用是北歸伊誰云憎徜徉淮海子潛疾嬰俟
其少間偕之北行豈其奄忽痛乖延陵剛弗愛克遂傷
厥生疇昔之夢飲子兕觥予欲從之扞格莫能今悟死
別神交匪冥今歲夏仲手書是承寄是新作託之稱傳
豈意期月邁此凶屯初接傳聞既疑且詢繼來訃告大
為震驚於戲已矣王兄歿而有靈鄙懷我聽以公壽言
六十六秩未嘗疾痛體胖心逸以公官業通貴之極三
十年間略無空隙以公文章不事雕飾平易溫雅簡而

有式以公聞望揚休山立聲價一時荆金趙璧以公繼
嗣怡怡蟄蟄翠竹高梧鸞停鵲植所為福全百福無逆
是用慰公能事可畢方之吾儕又有大弗克及者秉彝
豐厚度量寬弘愷悌樂易碩大光明不以達貴我崇彼
輕不以已長格物自矜心無城府口絕香臧孰為機張
以虞以防坦為蕩蕩內敬外方汪汪黃陂撓之不渾崑
崑高山仰之彌尊天下之人不間識否聞君之名僉曰
良友是喜是愛稱不容口我觀氣運有通有窒或負而

乘君子宜息遺逸阮窮固足推抑遽思飄蕩忽還穹碧
是用盡傷載悲載泣維此善人天地之紀幾世幾年生
此偉器一朝云亡歎興殄瘁茫茫九原愛莫之起悠悠
此懷曷維其已上以愼斯民之無祿下以惜平生之
知己嗚呼哀哉尚享

推氏卒哭祭文

至元廿四年歲次丁亥二月壬辰朔十七日戊申中議
大夫王惲謹以玄酒庶羞之奠敢昭告于亡妻推氏之

靈嗚呼禮嚴卒哭氣渝一時愾然興感悠悠我思去日漸
遠神而明之爰仰道宮有求戚知哀薦成事用光其儀
君子與孫衰衣纍纍心焉寸草恩則春暉伸哀報德泣
涕交頤而於自致其殆庶幾惟靈降鑒以慰永悲嗚呼
哀哉尚享

祭三藏佛圖澄文

惟師薄游襄國實開帝聰聞音知物變眩幽通非此無
以回猛鷲而神事功我師真詮不亡在空來拜祠下辛

歲初冬酌觴乞靈徘徊呪龍庶一勺之達水澆至人之
心胷也尚享

祭宋文貞公墓

至元十九年歲次壬午五月己未朔十一日己巳謹以清
酌之奠致祭于唐太尉文貞宋公墓下嗚呼惟岳降神
生甫及申為周之楨如公之生於唐迺開元之治具也
昔玄宗能遠而不忘一旦召而相之何其明邪及惑伶
人一謔公終老于家何其昧哉豈天寶之亂於後有不

容置大器於久安故耶於戲往者何咎國家方以親賢
為急天或寵綏四方若公者復克降靈作甫與申免夫
望隴思賢之歎此呂子所以再瞻隧道動曠世相感之
意也區區之誠惟神其鑒之尚享

授少中大夫福建閩海道提刑按察使告祖宗

文 己丑秋八月四日

至元廿六年歲次己丑八月丁未朔越四日庚戌孝孫
憚敢昭告于王氏三代祖宗祖妣之靈憚不肖獲承祖

宗遺訓以至今日又於此月初三日欽奉宣命進授少
中大夫福建閩海道提刑按察使是皆祖宗奕葉德積
之故越小子何能存歿光顯宜知所自特陳薄奠是用
昭告尚享

祭待制圖克坦衍文

維至元廿六年歲次己丑冬十月丁未朔十二日己未
少中大夫福建閩海道提刑按察使王惲致奠于故待
制徒單公之靈嗚呼禍與福善惡以應之變其常理有

不復致詰者惟翰林侍講學士顯軒先生厥心孔嘉樂善修德及其立朝行道固不傾悉晚歲得子又復良碩學由家傳志乃早立先生云亡相與咨惜念渠零屏繼任翰職淹留京師豈造物者將有俟而補先生之不及一旦天奪松摧玉折云何不淑而臻此極矐若堂之三封帳遼海之不溢何一氣之衰謝逮子身而迹熄余愈知善惡之巨量蒼蒼之不可必也不然豈行焉忽諸致皋陶庭堅之不食吾不可而識也噫

辭墳祝文

伏以甌閩東南之極徼憲使外臺之正名受命以來夙夜
祇懼有不遑寧處者於是月十七日卯刻與子公孺輩
前赴任所伏惟明靈相其不逮以道護之尚享

祭雙忠文

至元廿六年歲次己丑冬十月丁未朔二十六日壬申
謹以清酌之真敢昭告于唐臣中丞張公睢陽太守許
公之靈惟神忠抗全節義摧賊鋒既障江淮載清河洛

精爽在上其生炳如暉等適有事於維揚特乞回新眷
顧惟朽質遠涉畏塗過覬之心斷非敢萌不虞之變庶
祈默祐尚享

祭淮水文

惟神發源桐山橫界楚甸德參四瀆潤涵百川暉恭奉
綸恩遠臨殊域險阻炎蒸有所自惜者惟神鑒祐其安
以濟是則神上有以欽承明命下有以教臣子之義也
尚享

亡妻推氏祭文 遣奠祭文

維至元廿三年歲次丙戌冬十一月癸亥朔十有二日
甲戌中議大夫前行臺行御史王惲謹以牲醪之奠致
祭于夫人推氏之靈維君為婦克恭以母則式助我內
治其宜其適四十三年迺猶一日眷我貧家勤亦之極
惟是盡瘁遂臻于疾彌留八年屢值已棘孰祓其災稍
復安息孟冬辛酉遽變容度孰禡其魄溘先朝露惟此
喪制我實主之布冠齊衣我具舉之木美藏嚴恐速腐

之美慰汝心汝其顧之我卜甲戌窆焉襲吉奉安汝柩
皇姑之側升輶發引爰用控告汝宜勿憾我未為校魂
兮歸來些四荒不可以往兮惟汝子孫是依是保黯黯
精魂悄悄心目旬浹之間重有所祝日薄西山一語不
復念之盡傷又增悒鬱於戲零落山丘生存華屋自古
皆然非汝之獨惟弗偕老天為之酷有淚如泉永注河
曲嗚呼哀哉尚享

過趙祭忠武史公祠文

夫用物精多者英爽固昧垂顧異常者死生不殊我丞相忠武史公以丘山之重顧草芥之微其生也卵而翼之其歿也寐而訓之茲者奉詔比上展拜新祠敢乞明靈增益不逮蓋愚魯之性惟其素知於言動之間庶幾默佑尚享

秋澗集卷六十四

欽定四庫全書

秋澗集卷六十五

元 王惲 撰

辭

中林有烏辭唁姨母而思親也

哀哀母氏壺儀光兮我鞠我育其勞昌兮植思靜佳風
飄颺兮顧惟蒿蔚擬護芳兮菽水奉歡其憂忘兮母恃
子豫亦所望兮一朝致樂初未嘗兮夜夢見之晝微茫

兮歲月逾邁拱木蒼兮履此霜露中心傷兮我行宗城
如涓陽兮瞻戀姨闈自不遑兮展我孺慕聞母香兮贈
乏瓊瑰幣帛將兮枝同氣連何殊於幽明間兮庶幾母
心慰下泉兮中林有烏翮其反兮情極反哺鳴聲應而
喧兮可以人而不如鳥之志兮別淚盈睫下霑袂兮停
雲在空浩無際兮我思母氏曷有既兮

哀友生季子辭

并序

中統五年甲子歲夏五月廿有九日晝漏盡三十刻府

從事周貞以友生季子之喪來告聞之驚怛廼為輟食
因憶予弱冠時始識渠于教官張文紀學舍性資純雅
似不能言者叩其禮經皆能成誦于口既長從泌陽趙
公業詩賦故日夕翱翔相得為甚狎逮壬子秋顯軒徒
單公自甯來居曰今而後執經問學吾知所從矣於是
搢衣席下大玩厥辭含章既貞士論乃厭每自嘆古人
讀書患其無書今人置書不觀何居乎必廣萃羣書使
之滿家而已及三史甫畢而病嗜學之難成也如此可

勝嘆哉子天性孝友為人簡靜不羣喜作詩其較量體格推敲聲律有過人者然識者以骨清而癯耳小而偃恐非壽相也今年春顧見憊氣烝出顏間僕謂曰子殆病矣不然何神與氣索然無光耶子少休學本潤身守身為大吾子其慎之既而卧病在牀以迄于死初其父命其子曰而吏而商斷不汝為惟士與農廼所願學吁為父者可謂知其子而得其教為子者可謂盡其孝而養其志者矣維其天不假年聲光潛室不少白於世是

延可惜也於戲天道無親常與善人若季氏者可謂一
門善人矣遘罹凶極一至於此天之報施善人果何如
哉予不得而知也噫武死矣非文昌以攄予之哀而見
若之志如李觀歐陽詹之不幸終復聞於世者以昌黎
之文故也君諱武字子文世為青齊人壽三十有四遂
掇毫寓哀以抒其辭誄曰

猗嗟季氏以善傳兮種德及嗣培福田兮父母之心一
何賢兮子奉以行周且旋兮學根於心浩浩天兮再

世而昌其流淵兮有物忌媚坎壈纏兮云何不淑邁此
遭兮自古有死豈子然兮維卒不施涕所漣兮哀哀父
母白垂顛兮狎于弗順蓋子棺兮東城之野子之原兮
悲風瀟瀟淇水寒兮游魂一去不復還兮永矣無聞閔
九泉兮反袂拭面慨其嘆兮禍淫福善此何愆兮天道
悠遠疑其無所聞兮其脩與短不幸之間兮嗚呼哀哉
夫我何言子所安兮

故中奉大夫浙東宣慰使趙郡陳公哀辭

并序

至元十四年歲次丁丑秋中奉大夫浙東道宣慰使陳
公按營田東下歷明逾召九月七日歸屯新昌為賊姦
所乘遇害嗚呼哀哉公未歿前五月予夢公柩轉而過
衛再夢坐越府上望公而不得接後閱月復夢把臂談
詠如在試院中時第霧氣盪胸終不覩其面明日卜奉
常宋君不吉曰後幾日當有惡報至予魄動而不忍聞
既而公故吏張永錫以訃來告乃審公之所以亡嗚呼
哀哉初癸丑歲公侍謀于漢邸聞走名而喜之及尹洛

師一見如平生歡至元三年以邦伯釐衛日夕得游從
燕處為文章往復時或持論古今傾底裏無間至於振
衰礪懦視予志殊銳四載間猶一日也後五年予自襄
行得調公亦移鎮河湟自是不相覲者五易歲維十有
三年夏四月壬辰拙堂移考試河南得式公行躍躍不
能寐遂自梁抵申由宛葉入洛而竟事於汴寢飭游居
不斯須離者餘七十日公以平昔出處素所蘊而誌者
一發而盡於予竊壯夫志弘而毅氣剛以直學切而有

用器遠而足識皜皜乎有不可尚已者及祖帳夷門酒
酣歔歎悲不能訣去至揚解而歌曰孤忠耿耿信不疑
兮匪席匪石可卷移兮與子論交乃所期兮日暮途遠
將何之兮彼蒼悠悠其聞斯兮予上馬歸念且訝其遽
如許也嗚呼噫嘻公今死矣予尚忍言哉或者以玉山
賊門庭寇也終宋亡而不克揃新昌下邑也惡而無所
顧盍去諸子曰公之不去者以弭禍亂懷新附分也事
不辭難患不苟免志也去之民何賴焉賊或有知使洞

貫之誠一言開悟于以窮根窟掃餘孽宣威海道以靖
東南在公為弗難不幸擁馬直前言未及諭而克鋒闕
加蓋公之所能者天也其不能者命也嚮使因鼠輩而
喪厥守以偷生而為得計名節委地坐眎民殘豈公之
志也哉况公生平忠誼表表審量素定晚節操履益堅
其遇當行可為得少伸抱負分一死久矣昔顏太師知
賊狀已明將命而徑往李司徒視逆刀交下握節而不
去二公之甘心廟躬者正以忠烈之氣寧以一不幸遽

可慊然於其心哉今以公事節槩之不少異矣然不使
公從朱雲王遵瀝丹衷於折檻之前抗忠諫於伏蒲之
地奈何徒死道路纓絕於穿窬之手此士論共惜僕尤
哀而為之辭也公諱祐字慶甫趙之寧晉人固窮力學
工為詩尚氣能道所欲言節齋其自號也嗣子夔繼請
兵討賊得害公者七人戮越州市次子臯扶其喪葬北
邱之新阡其辭曰

維天降材深有謂兮清明萃躬經此一世事兮伊逢昌

辰臣子尤不可易兮鴻毛沛夙宜乎奮厥翼兮百纒幾
施有物訶以忌兮固窮善道退而甘所棄兮何縻以好
爵足將進而躓兮擠之禍賊天胡為而厲兮俾姦惡者
何所懲忠善者將何恃兮豈福善禍淫之戒持或撓而
弛兮豈命數一定善惡闕而致兮豈一氣偶然乘之者
隨所值兮不然何厚其所可薄而賢者莫錫類兮嗚呼
言至於此天道悠悠此心盡而俟兮自古有死死非以
義等草木之敝兮堂堂節齋明是義兮夫我何尤公所

求兮既獲死所公乃休兮有子而孝復厥讎而歸故丘
兮是或蒼蒼者有足賴神理於焉在兮魂歸來些歆予
文之一愜兮固亢身不歿名永肩於崧岱兮噫

故中奉大夫山東東西道宣慰使史公哀辭

事有曠世相感歎歎不自己者豈非義激於衷默有所
契而然耶况神交罔間沒而陰相者哉故宣慰史侯五
路萬戶留後之嫡長太尉忠武公之猶子也不肖自早
歲蒙開府盼睐獲識侯于明而合并有數款狎則未也

遠提憲朔南適平宋來歸時接燕談三載之間猶一日
然既而起公慰宣東方走亦持節甌越前次甬東一夕
夢公相戒云君方從事閩徼得喪有命尚慎眠食不宜
中動臨岐握手有戀戀不已者予又嘗銘公兄墓以名
驟見貺及是倦游思歸公復見夢曰遠回在邇但吾乘
不得與同耳後數日聞公訃馬亦隨斃計公卒辰適始
夢甬上時也吁亦異哉嗚呼公於余深矣往有以教歸
有以啟迪之非神交而何哭墓草宿且惡夫涕之無從

也癸巳冬予在翰林公之子親衛指揮使煥弟秘監輝
來謁出諸君銘章仍有徵於余感念疇昔廼抒願言公
為人深靖有識量善謀斷生長豪貴不以居養自高周
知物情未嘗減否出口平居褒衣素裙以琴書自娛賓
從宴游若與世浮沈者及其治兵作牧撫循籌畫二者
並用不相底滯有成筭而無遺慮所謂總戎作氣帥尹
而寓軍容者公其有焉宜乎為世父鍾愛名聲昭於人
功烈著于後也至元甲申夏六月余將往歷下見公於

所居南樓置酒酌別既酣談論古今成敗傾徹底裏且
及平時寤寐風雲破碎陣敵等舉如濟南珍闕橫槊臨
江之役皆是也曰異時倘經故處當知予敵王所愾志
也吾老矣將無復再得去三年公薨謝官下於戲公今
已矣顧視一時鉅室世臣其麗不鮮較其德業聞望哀
榮終始略無遺憾鮮有及公者焉然尚何辭而哀之惟
是存歿陰相久要之言耿耿在抱義激愚衷故特發其
隱而未書者俾告公靈庶慰車過腹痛繫劔喬木之意

云其辭曰

天之降才實為艱兮用應時需又所難兮文武一轍造
物者靳其全兮合而兼濟粵惟世之賢兮堂堂史公北
方強兮知柔知剛萬夫望兮依乘風雲秉鉞戎軒蕩無
前兮有來羣后策勛盟府相後先兮收斂豹韜作牧民
編于蕃宣兮國倚以重民懷夙愛動海堦兮神而化之
人亡政息伊時遭兮嗚呼哀哉若公者其英其靈有無
間兮豈隨化歸盡魂無不之渺逝川兮其或奮為神明

司幽玄兮明復為人續其志之淵兮若或亶然又不知其幾世幾年兮論至於此尚何言兮所以增我永慨者正復哀斯民之不幸抑且感知已而涕漣也

祝辭為劉孝先子迪作

古者名訓冠前字加冠後改而推稱蓋以責其禮之成全成人之道孝悌忠信莫重而先四者有立吉孰大焉曰禹曰益九官讓賢及陳做告也如是况余人然山木取義併其名而字之予以四行擴克迪傳劉氏子其服

膺拳拳猶日見鄉先生于朝端也

周氏小女祝辭

元貞元年秋過總尹孟戡家出小女拜且命
誦孝經論語等篇殊琅然也仍請訓辭為祝
因書以付之蘭即燕故家留判趙公外孫也

英英女孥何靜嘉兮翁初見之燕故家兮牙牙點粧玼
瓊瑤兮學語未正鶯囀花兮今年拜予雙鬢鴟兮洞簫
有賦非所誇兮孝章魯語誦無涯兮謝以蘊稱汝其昭

兮詢以小字曰蘭嬌兮歲蕤芳華瞻翠翹兮猗猗揚揚
茲容韻兮女惟德馨幽閒在兮佩而服之儀與誠兮女
紅蠶休尤所賴兮守以貞順敬毋怠兮付之汝誦于以
書悅兮

觀溟漲辭

山雲蒸兮杳而昏大壑澮兮涇流奔渚崖曲兮千里一
夕平兮光瀾二水之充兮無幽無深遠朝滄溟兮臣妾
之心幽人觀其瀾逝者何嘆兮周而復還萬物化結水

之仁功成而退兮殆君子之逡巡日三往而睇視兮悟
夫噓噏於此身又何必酌樽中之醪問江山之神也耶

鳴榔曲

壬申春三月予自京師南還十八日夜半過
平棘西汶水上聞漁人鳴榔中流聲響甚厲
駐車起聽令人杳然有江灣漁樂之思作鳴
榔曲以寫其音節云其詞曰

榔鳴葦間回風遠遞洲空月寒音節愈厲響應虛谷波

翻木際驚羣魚而入
揆笑古人之用智
至于駐車而三
聽欲擊舟而同逝

田橫墓歌辭

至元丙子夏六月奉堂移偕節齋陳公以事
東之偃師過橫墓下慨慕耿光悲歌而去歌曰
秦以帝稱魯連之所恥兮漢以劍起布衣之所極兮橫
王東海意不充其覬兮天命攸歸吾將奚所適兮死或
當理庶烈士之則兮

乾
坤
廣
慶

秋澗集卷六十五